

A.5.1 VERENIGDE DIENSGROEP VIR DIENS EN GETUIENIS

1. INLEIDING

1.1 Die Verenigde Diensgroep vir Diens en Getuienis (VDDG) van die familie van NG Kerke het in 2006 deur middel van 'n ooreenkoms wat deur al vier kerke in die familie aanvaar is, tot stand gekom. Die Algemene Diensgroep vir Diens en Getuienis (ADD) het by die vorige Sinode in 2011 volledig oor die totstandkoming van die VDDG gerapporteer.

1.2 Dié Sinode het soos volg oor die VDDG besluit: *“Die Algemene Sinode besluit dat, in die lig van die voorgestelde strukturering van die Algemene Sinodale werksaamhede, die ooreenkoms met die ander kerke rakende 'n Verenigde Diensgroep vir Diens en Getuienis in stand gehou word en dat verteenwoordigers van die NG Kerk om in die VDDG te dien, aangewys word.”*

1.3 Die Moderamen het sewe persone aangewys om die Algemene Sinode in die VDDG te verteenwoordig naamlik prof Piet Meiring, dr. Carin van Schalkwyk, Gideon van der Watt, Eddie Orsmond, Botha van Aarde asook di. Willem Botha en Willie van der Merwe.

2. BESTUUR VAN DIE VDDG

2.1 Die volle VDDG strewende daarna om een keer per jaar te vergader. Die vergadering wys 'n bestuursgroep aan wat tussendeur die daaglikse bestuur van die liggaam behartig.

2.2 Tot 30 Junie 2012 het die kantoor van die Algemene Sekretaris die sekretariaat van die VDDG behartig. Na ds Willie van der Merwe se vertrek voorsien dié kantoor steeds beperkte ondersteuning aan die VDDG en ds Van der Merwe gaan, met die instemming van Hugenote Kollege, voort met die sekretariaat. Die jongste vergadering van die VDDG wat in Junie 2013 gehou is, het egter geoordeel dat die reëling beperkend inwerk op die VDDG en derhalwe is besluit om die Algemene Sinode van die NG Kerk te versoek om meer kapasiteit tot beskikking van die VDDG te stel.

3. OPDRAG AAN DIE VDDG

3.1 In die huidige ooreenkoms tussen die vier kerke in die NG Kerkfamilie waarvolgens die VDDG nou funksioneer, word dié liggaam se opdrag in breë terme omskryf. Intussen is die Algemene Diensgroep vir Diens en Getuienis (ADD) deur die Algemene Sinode afgeskaf. Die afskaffing van die ADD het spesifieke leemtes gelaat wat tot dusver nog nie voldoende hanteer is nie.

3.2 Die een leemte is die aanwysing van 'n beheerraad vir die Christelike Lektuurfonds (CLF), 'n funksie wat vroeër deur die ADD behartig is. Vroeër het die ADD ook as 'n skakel tussen die Algemene Sinode van die NG Kerk en beide die Kerklike Maatskaplike Diensteraad (KMDR) en Hugenote Kollege gedien.

3.3 Alhoewel geargumenteer kan word dat die Moderamen van die Algemene Sinode bogenoemde funksies van die ADD oorgeneem het, sien die CLF en Hugenote Kollege hulleself as organisasies wat al vier kerke in die NG Kerkfamilie wil dien en in die geval van die CLF dien verteenwoordigers van al vier kerke in die beheerraad. Wat Hugenote Kollege aanbetref, is beide die NG Kerk en die VGKSA lede van die maatskappy en verteenwoordig in die direksie.

3.4 Die KMDR bestaan uit die maatskaplike diensorganisasies van die onderskeie sinodes van die NG Kerk, maar in praktyk word al vier kerke deur die onderskeie lede van die KMDR bedien. Die KMDR sien homself derhalwe ook as 'n organisasie vir al vier kerke in die VDDG.

3.5 Al drie genoemde organisasies huldig die standpunt dat die VDDG se opdrag gewysig moet word om voorsiening daarvoor te maak dat die genoemde instansies aan die VDDG rapporteer en dat die VDDG kan funksioneer as ledevergadering van die CLF wat die beheerraad namens die vier deelnemende kerke in die VDDG kan aanwys.

4. AGENDA VAN DIE VDDG

4.1 Die VDDG poog om, sover moontlik, alle sake wat deur die deelnemende kerke na hulle bediening, of kommissies, vir diens en getuienis verwys word, gesamentlik te hanteer. Die gesprek in die VDDG het die afgelope paar jaar sodanig verdiep en die onderlinge verhoudinge het so gegroei dat daar inderdaad 'n verenigde diensgroep ontstaan het. Die sake op die agenda het die VDDG se sake geword, ongeag die oorsprong daarvan, en die verslae aan die onderskeie kerke word ook gesien as die gesamentlike verslae van die VDDG.

4.2 Die praktyk skep verder die geleentheid dat die verteenwoordigers die problematiek waarmee die onderskeie kerke worstel, kon leer verstaan en ook by mekaar kon leer hoe om dit te hanteer.

4.3 Mettertyd het dit vir die VDDG duidelik geword dat sy agenda in vyf fokusse uiteenval, naamlik teologiese besinning, kerkeenheid, diakonaat (diens), sending (evangelisasie) en publieke getuienis. Die VDDG funksioneer op die vlak van die Algemene Sinode en verstaan dat sy bevoegdheid ten opsigte van die fokusse beperk is tot die rolle van fasiliteerder, 'n veranderingsagent, 'n aktiveerder of koördineerder.

5. TEOLOGIESE BESINNING

As gevolg van 'n gebrek aan fondse kon die VDDG nie met die daarstelling van 'n reeks werkboeke gebaseer op die basisteorie in "Diens en Getuienis in Eenheid (2011)" vorder nie. Hierdie saak bly egter 'n hoë prioriteit vir die VDDG en verskeie pogings word nou aangewend om die reeks die lig te laat sien. Tans is gesprekke met die CLF, Bybel-media en Hugenote Kollege aan die gang om vennootskappe rakende dié projek met die instansies aan te gaan.

6. KERKEENHEID

6.1 Die VDDG het tot stand gekom as 'n liggaam wat kerkeenheid wil dien en bevorder. By sy jongste vergadering in Junie 2013 is daar met groot dankbaarheid kennis geneem van die vordering wat gemaak word met die gesprekke onder leiding van Wêreldgemeenskap vir Gereformeerde Kerke waarby al vier kerke nou betrek word.

6.2 Die totstandkoming van sinodale strukture soortgelyk aan die VDDG wat as loodsprojekte, maar ook as tekens van hoop, kan dien, is opnuut geïdentifiseer as 'n prioriteit en die VDDG wil sinodes graag hierin bystaan.

7. DIAKONAAT

7.1 Die VDDG het begin met 'n werkgroep wat aandag gee aan die bevordering en ondersteuning van die gemeentes se diakonaat. Die doel van die werkgroep was om materiaal te ontwikkel wat deur gemeentes gebruik sou kon word. Die werksaamhede moes as gevolg van 'n tekort aan fondse ook opgeskort word, maar pogings word nou aangewend om dit in samewerking met die KMDR en Hugenote Kollege weer aan die gang te kry.

7.2 Die vennootskap met die National Religious Association for Social Development (NRASD) ten opsigte van die projek wat op die tuisversorging van persone met Vigs en die versorging van kwesbare en weeskinders as gevolg van Vigs, fokus, gaan steeds voort. Die projek word deur die *Gobal Fund* befonds en die KMDR as geregistreeerde organisasie sonder winsoogmerk is verantwoordelik vir die bestuur die projek. Teen September 2012 het 4440 kinders en 3402 pasiënte reeds versorging deur die projek ontvang.

7.3 Die *Southern African Diaconal Partnership* (SADP) tussen die VDDG en gereformeerde kerke in Noord-Amerika gaan steeds voort. Daar is ook vennootskappe met kerke in Europa wat deur die VDDG gekoördineer word.

7.4 Die transformasie van die maatskaplike welsynsisteem in Suid-Afrika het steeds 'n baie negatiewe uitwerking op die sinodaal-georganiseerde professionele maatskaplike dienste, veral ten opsigte van die toekenning van staatsubsidie en die eise wat aan die dienste gestel word. Saam met ander netwerke in die land is die KMDR ook intensief hierby betrokke.

7.5 Die wisselwerking tussen die gemeentes se diakonaat en die professionele dienslewering is nog 'n tema op die KMDR se agenda. Een van die vrae is wat die impak van 'n moontlike ineenstorting van die professionele dienste en residensiële versorging op gemeentes kan hê. Aan die ander kant is dit so dat die kerklike maatskaplikediensorganisasies oor baie ervaring en kundigheid beskik wat baie waardevol vir die verdere uitbouing van gemeentes se diakonaat kan wees.

7.6 Die verslag van die KMDR is hierby aangeheg as selfstandige verslag.

8. SENDING

8.1 Evangelisasie, kerkplanting, dialoog met ander godsdienste, die ontwikkeling van multi-kulturele gemeentes en die ontwikkeling van interkulturele vaardighede bly steeds belangrike prioriteite van die VDDG. Alhoewel daar begin is met die ontwikkeling van materiaal oor sommige van die temas, moes die projek ook weens 'n tekort aan fondse opgeskort word. Gesprekke is nou aan die gang om die CLF, Bybel-media en Hugenote Kollege as vennote te betrek in die ontwikkeling van materiaal en die aanbied van kort kursusse oor die temas. Die VDDG is van mening dat vordering op die terreine nie net die uitbreiding van die Christelike geloof sal dien nie, maar ook 'n bydrae sal maak tot versoening in die land.

8.2 Versoening is steeds 'n belangrike prioriteit vir die VDDG. Daar is begin met 'n projek om kort kursusse wat praktiese versoeningsprojekte in gemeenskappe fokus, te ontwikkel. Die VDDG is van oordeel dat sulke projekte ook kerkeenheid sal dien.

9. SEISOEN VAN MENSWAARDIGHEID

Die VDDG is opgewonde oor die Seisoen van Menswaardigheid wat in die Familie van NG Kerke beoog word en oordeel dat daar talle raakvlakke is met die sake op die VDDG se agenda. Daarom wil die VDDG graag saamwerk met die ontwikkeling van dié seisoen.

10. PUBLIEKE GETUIENIS

Die VDDG is van mening dat 'n gesamentlike publieke getuienis deur die familie van NG Kerke 'n belangrike impak kan hê op die Suid-Afrikaanse samelewing en daarom word die aangeleentheid as 'n fokus van die VDDG gesien. Die VDDG is egter baie bewus daarvan dat dit ook 'n belangrike funksie van die kerke se leierskapstrukture is. Die VDDG sou graag wou sien dat die saak ook hanteer sal word in die gesprek oor die opdrag van VDDG waarna hierbo reeds verwys is.

11. VENNOOTSKAPPE

Die bevordering van diens en getuienis-vennootskappe met die kerke in die breër NG Kerkfamilie in Afrika is nog 'n saak wat vir die VDDG baie na aan die hart lê. Dit is egter nog 'n saak waarby die leierskapstrukture van die kerke ook belang het vanweë die ekumeniese verhoudinge waarbinne die vennootskappe gebeur. Verskeie kerke, asook sinodes van die NG Kerk, het die behoefte dat die vennootskapsontwikkeling verder geneem moet word en die VDDG het besluit om dit op sy agenda te hou.

12. AANBEVELINGS: VDDG

12.1 Die Algemene Sinode bevestig dat die Verenigde Diensgroep vir Diens en Getuienis 'n belangrike bydrae maak tot die vestiging van 'n gesamentlike diens en getuienis deur die vier deelnemende kerke en versoek die Moderamen om 'n proses te inisieër ten einde die opdrag en mandaat van die VDDG in meer detail te omskryf. In die proses moet spesifiek aandag gegee word aan eerstens die verhouding tussen die VDDG en die CLF, KMDR en Hugenote Kollege en tweedens die mandaat aan die VDDG om as ledevergadering van die CLF te funksioneer wat ook 'n beheerraad vir CLF kan aanstel .

12.2 Die Algemene Sinode versoek die Moderamen om in die 2014/2015 begroting reeds aandag te gee aan die kapasiteitsbehoefte van die VDDG.

Prof Piet Meiring (voorsitter)
Ds Willie van der Merwe (skriba)